

## De Alde muss weg

E Geschischd vunn de Gebrüder Grimm  
Gedd mir in ledschder Zeit nit ausem Sinn.  
Vum Großvadda – der war alt unn zidderisch,  
der passt da Famillje nimmeh om Disch.  
Er schlirft die Subb, duud beim Esse huddele,  
duud sei Jubbe unn oft aach die Dischdeck vasuddele.  
Monschmol, das siehd nadierlich nit abbedidlich aus,  
laafdem es Esse ausem Mund eraus.  
Die Fraa vunn seinem Sohn find das gonz ekelisch  
unn entfernd de Oba vunn Schduhl unn Disch.  
Vunn jetzt ohn hadda uff da Owebonk sei Platz gehat,  
e Tonschisselsche uffem Knie, oft nit emol satt.  
Sehnsischdisch hadda uff de Disch geguckt  
unn donn die Drähne erunner geschluckt.  
Sei Hänn honn die Schissel ball nimmeh gehall.  
Uff äämol is alles uff de Boddem gefall.  
Das hat nadierlich e großer Ballawer genn.  
Dodenoh war sei Geschirr nur noch aus Holz gewähn.  
Äänes Daches sitze se gemiedlich in da Kisch,  
de Klään uffem Boddem, beschäfdischd sisch.  
Mit Holzbreddscha hondiere die klääne Hänn.  
Do froht sei Vadda: „Was soll das dann genn?“  
Der klääne Bub erklärt gonz stolz:  
„Fa eisch, Vadda unn Mudda, e Dibbsche aus Holz,  
in das ihr schpäder eier Esse krien,  
wenn ihr emol alt unn isch erwachsen bin.“  
Die Eldre ware starr unn stumm.  
Jetzt sinne noch die Drähne kumm!  
Sofort wird de Großvadda onn de Disch geholl,  
weil´s ihm ab jetzt nur noch gudd gehn soll.

Die Geschischn is jo heit nimmeh akduell.  
Ma hat´s mol geläas, donn vagesst ma´s schnell.  
Dähd ma´s awwer in die heidisch Zeit iwwadrohn,  
donn heert sisch die Geschischn folgendermaße ohn:

E Großvadda, kronk unn alderschwach,  
lääbd midde Junge unner äänem Dach.  
Er hat in seim Lääwe schunn vill geschaffd.  
Jetzt gehd´s halt nimmeh, er hat kemmeh Kraft.  
Er is halt mied und zidderisch,  
hat kä Manniere meh om Disch.  
Die Schwiejerdochder mennd: „Er is nimmeh fa gudd.“  
Om Beschde ma de Alde ins Aldersheim duud.  
Sie ware aach schunn gugge, de Klään war mit,  
domit ma fa de Oba was Guddes aach kritt.  
Si honn was gefunn unn denke sisch halt,  
dass es dem Oba dort gudd gefälld.  
Sie sahn sisch: „Mir bringe´s em bei,  
dass das fa ihn unn fa uns es Beschde sei.“  
Dem alde Monn war´s Herz aarisch schwer,  
sei Enkelsche, das liebder doch sehr.

Om Dach denoh is donn ebbes passiert,  
das hat die Eldre gonz scheen schockiert.  
De Klään kummt ausem Kinnagaade, juxt unn lacht,  
schwenkt e Bladd Babbier: „Das honn isch gonz allään gemacht!“  
Do war ze siehn e großes Haus  
Mit vill Finschdere, aus jedem guggt ääner raus.  
Vorredrohn das soll e Fahrschduhl sinn.  
Mit Krigge is aach noch ääner ze siehn.  
„In das do Haus solle ihn mol gehn,  
Mamme unn Babbe, is das nit scheen?  
Wenn ihr wie de Oba mol alt genn sinn  
Unn isch groß, schdark unn reisch donn bin.  
Do kumm isch, wenn isch Zeit han, eisch besuche,  
bring Blume mit unn gudda Küche.“  
Die Alde stehn wie vumm Blitz gerieht.  
Jetzt honn se sisch doch aarisch scheniert.  
Es wär noch ze iwwaleje, noch isses Zeit,  
bei unserm Vadda isses vielleicht doch nit soweit.  
Vunn ääner zu da onner Minudd  
hadda Oba´s bei seiner Famillje widda gudd.  
Er wird nimmeh fa alles kriddisiert.  
So wie er is, wird er akzebdiert.

So war´s frieher, so isses noch heit;  
So wird´s wohl bleiwe fa alle Zeit.